

Rapport dil president

La suprastonza ei serimnada 4 gadas igl onn vargau.

Las activitads sportivas vein entschiet sco mintg`onn cun il camp da tennis el Tessin. Leu vein nus passentau ina biala fin d'jamna ensemen. Nus vein filau vid la tecnica, essan denton era stai da cumpignia. La dumengia avonmiezdi era l'aura buc aschi favoreivla, aschia che nus vein lu stuiu ni astgau trenar en halla.

Ina jamna pli tard vein lu saviu preperar ils plazs, e paucs dis sunter entscheiver cun ils tranaments. Ei fuss d'avantatg, sch'in ni l'auter dapli savess gia segidar il venderdis, aschia che nus savessen luvrar speditivamein la sonda endamaun.

L'entschatta matg han las partidas d'Interclub entschiet. Dapli da quellas partidas vegn il meinagiug Silvio Albin ad orientar pli tard.

Sper las partidas d'Interclub ed ils turniers usitai, vein era uonn puspei priu part al Cup grischun dils clubs. Giugau han uonn: Simona Demont, Ricarda Tuor, Gion Petschen ed Erich Decurtins. Sco gia ils davos onns vein giu grond success ed uonn schizun contonschiu il final. Il final vein nus spiars cnap 2 – 1 encunter Landquart. Sper intensivs giugs vein nus era gudiu la cumpignia e saviu tgirar novs contacts.

Duront la stad vein nus puspei menau atras las seras dil club. Sco igl onn vargau stoi jeu dir ch'igl ei donn che quellas seras vegnan buca frequentadas meglier. Quellas seras fussen igl ideal liug da combinar il dar tennis cun il star da cumpignia e dar ina paterlada. Duront talas seras ein gia enqual bunas ideas naschidas, las qualas meinan tier in prosperar dil club.

El decuors dalla stad vein nus era montau la stora da sulegl nova. Quella ei gia secumprovada duront ils turniers, seigi quei encunter la plievgia, per star a suost ni da gronda calira.

Dallas finanzas vein nus giu bien quittau igl onn vargau. Grazia al lotto, mo era grazia al sustegn financial dil cantun, per menar atras turniers, savein nus presentar in bien quen. Per che quei stetti vinavon aschia, eis ei era impurtont che vus separticipeschies a nos turniers. Aschiditg che nus vein glieud avunda per menar atras ils turniers, savein nus era seprofitar da quei sustegn financial.

La IG Surselva ha tschentau a nus la damonda da sustegn da CHF 2'000.- per la cuvrida cun in ballun da 2 plazs da tennis a Glion, per saver dar tennis era igl unviern. Cun quels daners vegn la cuntinuaziun dallas lavurs, las damondas da baghegiar eav. sustenidas. Nus vein dau suatientscha alla damonda.

Il lotto 2020 vein nus deplorablamein buca saviu menar atras, muort il virus corona. Nus vegnin denton segir ad encurir in niev datum pil lotto enzacu pli tard.

Cunquei che quei ei ina fetg impurtonta intrada per nies club lessel jeu engraziar grondamein al team dil lotto: la Silvana Guldinmann, la Carmen Bearth, la Karin Peng, la Lea Alig, il Silvio Albin, il Ramun Venzin ed igl Erich Decurtins.

Per il proxim onn fuss ei miu giavisch, che nus fagessen part pli stedi allas seras dil club, sco era a nos turniers. Jeu crei che las activitads dil club ein impurtontas per il prosperar dil club.

Per finir engraziel jeu a mes consuprastonts per la buna collaboraziun che nus vein giu, sco era a nos sponsurs dil lotto ed allas fatschentas che han ina reclama giu sil plaz da tennis.

In engraziel era allas equipas d'Interclub per lur lavur ed a tut quels che han segidau sin ina ni l'autra moda duront igl onn vargau.

Trun, il mars 2020

il president

Decurtins Erich